

DOMENIE XXIX «VIE PAL AN»

Jutoris pe Liturgjie

Domenie, ai 21 di Otubar dal 2018

Ancje in cheste domenie, midiant de liturgjie, si cjatin a cjaminâ cun Gjesù che al va viers Gjerusalem, o miôr viers de passion e de muart. Za par trê voltis lui nus à visâts dal so destin: Bisugne che il Fi dal om al patissi... al sarà consegnât tes mans dai oms... lu coparan... (8, 31-33; 9, 30-32; 10, 32-34).

Cheste situazion dramatiche no i impedìs a Gjesù di continuâ a stânus dongje cui siei insegnaments; insegnaments che a valin pe nestre spirtualitât personâl e pes nestris comunitâts in cheste precise societât.

Dôs domenii indaûr il Signôr nus spiegave dall matrimoni cristian - no son plui doi, ma une sole cjar -; domenie passade sul doprâ te caritât i bens che o vin - Va, vent dut ce che tu âs, daural ai puars e vuê nus cjacare dai sorestants te comunitât - chel di vualtris ch'al vûl jessi il prin, ch'al sedi famei di ducj (10, 2-12. 17-30. 35-45).

Cheste lezion e je di grande impuartance te nestre diocesi li che il clericât al va a mont intant che i batiâts a varan di cjapâsi responsabilitâts gnovis e contrariis al abuso sessuale, di potere e di coscienza, quale è il clericalismo (p. Francesc, Lettera al popolo di Dio).

Il discors al è ambientât in chel cjaminâ di Gjesù viers Gjerusalem cuasi avîs dal troi che nus tocje cjapâ par sedi siei dissepui. Par rivâ dulà? Li di Gjesù che al è vignût par dâ la sô vite in riscat par tancj di lôr.

La antifone di jentrade e pues sedi une invocazion dal Signôr che al va viers Gjerusalem e une preiere tal cûr dal dissepul che al tribule par amôr dal vanzeli.

Antifone di jentrade

Sal 16,6.8

Jo ti clami, Diu gno, ma tu rispuindimi.
O soi sigûr che viers di me tu slungjis lis tôs oreli.
Vuardimi, Signôr, come la lûs dal voli,
platimi te ombre des tôs alis.

Colete

Diu onipotent e eterni,
danus une volontât che si plei simpri denant di te
e di servî a la tô maiestât cu la scletece dal nestri cûr.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Is 53,2-3.10-11

Se al ufrîs la sô vite tant che un sacrifici di espiazion, al viodarà une dissidence.

Il servidôr dal Signôr che al sa ce che al è il patî al è Gjesù. La liturgjie cun cheste leture e vûl fânus jentrâ tai dolôrs trements e te fede cence fin di chel servidôr just che al justificarà tancj di lôr, cjapantsi sù lui lis lôr inicitâts.

Gjesù tai siei patiments al à cjapadis sù ancje lis mês strambariis o inicitâts.

Dal libri dal profete Isaie

Il Servidôr dal Signôr
al è cressût tant che un butul denant di lui,
e tant che une lidrîs ch'e salte fûr de tiere arsinide.
Spresêat, butât di bande dai oms,
om dai dolôrs, ch'al sa ce ch'al è il patî,

Ma al Signôr i à parût ben di fruçâlu cul patî.
se al ufrîs la sô vite tant che un sacrifici di espiazion,
al viodarà une dissendence ch'è vivarà a lunc,
e midiant di lui si fasarà la volontât dal Signôr.
Par vie dal torment de sô anime al viodarà la lûs,
si passarà de sô cognossince.
Il gno servidôr just al justificarà tancj di lôr,
cjapantsi sù lui lis lôr incuitâts.
Peraule di Diu.

SALM RESPONSORIÂL

dal Salm 32

Cuant che une persone e ven brustulide te tribulazion, se e mancje la rosade de fiducie di chel dongje, ogni sperance e mûr. Al cristian, - d'indulà mi vignaraial jutori? - il cûr i rispuint: Il jutori mi vignarà dal Signôr: lui al à fat cîi e tiere (Sal 121).

Te fede i nestrîs vecjôs e i sants dai nestrîs paîs a àn scjavalgjât dificoltàs altis e penzis come monts. Cussì al è ancje des personis, oms e feminis santis di vuê.

E diseve S. Taresie di Avile: Nuie ti inobrissi, nuie ti spaventi; dut passe; il Signôr ti baste. Al reste valit ancje par nô chest salm 32 e il ritornel:

R. Danus la tô gracie, Signôr, nestre sperance.

Se cjantât: Il cjant dai salms responsoriâi, p.166.

La perauale dal Signôr e je juste
e fedele ogni sô vore.

Lui al ten pe onestât e pe dretece;
dal boncûr dal Signôr e je incolme la tiere. **R.**

Ve, il voli dal Signôr si poe sun chei che lu rispîetin,
sun chei che tal so boncûr a sperin,
par sfrancjâ de muart lis lôr vitis,
par tignîju in vite in timp di miserie. **R.**

Viers dal Signôr e brame la nestre anime:
al è lui nestrî scût e nestrî jutori.
Ch'al sedi sore di nô, Signôr, il to boncûr,
parcè che dome sun te o stin fidâts. **R.**

SECONDE LETURE

Eb 4,14-16

Svicinînsi cun plene fiducie a la sente de gracie.

Scoltîm cun calme, perauale dopo perauale chestis magnifichis cuatri riis de letare. Culi Gjesù al aparten a la nestre puare vite, al à travanât i cîi e al pò judâmus tal moment just. Al è propit il câs di sigurâsi che o cjatarîm gracie e par jessi judâts tal moment just.

De letare ai Ebreos

Fradis, stant ch'ò vin un prin predi ch'al à travanât i cîi, Gjesù, Fi di Diu, tignîm salde la nestre fede. Di fat no vin un prin predi che nol sedi bon di vê dûl des nestrîs pecjîs, sint stât provât ancje lui in dut come nô, fûr che tal pecjât. Svicinînsi duncje cun plene fiducie a la sente de gracie, par vê la remission, par cjatâ gracie e par jessi judâts tal moment just.
Peraule di Diu.

CJANT AL VANZELI

cf. Mc 10,45

R. Aleluia, aleluia.

Gjesù Crist al è vignût par servî

e dâ la sô vite in riscat par tancj di lôr.

R. Aleluia.

VANZELI

Mc 10,35-45

Il Fi dal om al è vignût par dâ la sô vite in riscat par tancj di lôr.

La vergognose domande dai doi dissepui i da l'ocasion a Gjesù di sclarî la sô mentalitât sul mût di compartâsi dai soestants. O podaressin dî, semplificant, che al è escludût ogni autoritarisim di adult, intant che e je benvignude ogni autorevolece che e rive dal bas.

In Gjesù e je butade di bande ogni ideologjie; lui al reste l'esempli concret di imitâ: il Fi dal om nol è vignût par jessi servît ma par servî e par dâ la sô vite in riscat par tancj di lôr.

Dutis lis spirtualitâts e devozions e religjons a àn di passâ par chest esâm di cussience che lis palese o validis o falsis.

Dal vanzeli seont Marc

In chê volte, si svicinin a Gjesù Jacum e Zuan, fîs di Zebedeo, e i disin: «Mestri, o volìn che tu nus fasis ce che ti domandin». Ur domandà: «Po ce volêso che us fasi?». I rispuinderin: «Danus di sentâsi un a la tô gjestre e un a la tô çampe inte tô glorie». Ma Gjesù ur disè: «No savês nancje vualtris ce ch'ò domandais! Rivaiso a bevi il cjaliç ch'ò bêf jo o a jessi batiâts cul batisim ch'ò soi batiât jo?». I rispuinderin: «O rivin». Ma Gjesù ur disè: «Il cjaliç che jo o bêf lu bevarês ancje vualtris e ancje cul batisim ch'ò soi batiât jo o sarês batiâts, ma sentâsi a la mê gjestre o a la mê çampe no mi sta a mi di dâusal, ma al è par chei ch'al è stât preparât par lôr».

Sintint cussì, chei altris dîs a tacarin a invelegnâsi cuintri di Jacum e di Zuan. Ma Gjesù, dopo di vêju clamâts dongje di se, ur disè: «O savês in ce sisteme che chei che a son ritignûts soestants dai popui ju tegnin sot di parons e i lôr grancj ju tibiin. Nol à di jessi cussì fra di vualtris; ma se un di vualtris al vûl jessi grant, ch'al sedi vuestri famei, e chel di vualtris ch'al vûl jessi il prin, ch'al sedi famei di ducj. Di fat il Fi dal om nol è vignût par jessi servît ma par servî e par dâ la sô vite in riscat par tancj di lôr».

Peraule dal Signôr.

Su lis ufiertis

Danus, Signôr, ti prein,
di cirî cun cûr libar i tiei regâi,
par che, purificâts de tô gracie,
o vignin smondeâts propit cui misteris che ti servin.
Par Crist nestri Signôr.

Antifone a la comunion

Sal 32,18-19

Il voli dal Signôr si poe sun chei che lu rispjetin,
sun chei che tal so boncûr a sperin,
par sfrancjâ de muart lis lôr vitis,
par tignîju in vite in timp di miserie.

O ben:

Mc 10,45

Il Fi dal om al è vignût par dâ la sô vite
in riscat par tancj di lôr.

Daspò de comunion

Il contat cu lis robis dal cîl
che nus zovi, Signôr,
par vê i tiei benefizis in cheste vite
e par jessi inluminâts su lis realtâts eternis.
Par Crist nestri Signôr.

* * *

Riflession di pre Antoni Beline: **Servî, no jessi servîts**

La supierbie, il volê jessi prins di ducj, parsore di ducj e je une robe tant fine e tant perfide che ancje i doi fradis si contindevin i prins puescj tal ream di Diu. E seben che chei altris ju stiçavin, lôr salts a domandavin di sentâsi un a drete e un a çampe in chelaltri mont.

Alore Gjesù ur à dade une lezion...

Vanseli par un popul, an B, p. 171

* * *

Cjants

Libri Hosanna, sot dal titul Eucaristie: messe, benedizion eucaristiche, rîts e cjants; dal n.7 al n.62 comprendût.

* * *

Il cantico di Maria (il Magnificat) non si sbaglia e, come un sottofondo, continua a percorrere la storia perché il Signore si ricorda della promessa che ha fatto ai nostri padri: «Ha disperso i superbi nei pensieri del loro cuore; ha rovesciato i potenti dai troni, ha innalzato gli umili; ha ricolmato di beni gli affamati, ha rimandato i ricchi a mani vuote» (Lc 1,51-53), e proviamo vergogna quando ci accorgiamo che il nostro stile di vita ha smentito e smentisce ciò che recitiamo con la nostra voce. Con vergogna e pentimento, come comunità ecclesiale, ammettiamo che non abbiamo saputo stare dove dovevamo stare (...). Abbiamo trascurato e abbandonato i piccoli.

p. Francesco, Lettera al popolo di Dio

* * *

- * *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*
- * *50 corâi de cristianitât todescje voltâts par furlan, ed. Glesie Furlane, 2016.*
- * *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La Nuova Base.*
- * *Par domandâ chescj libris scrîvêt a info@glesiefurlane.org*